



Aqqalu C. Jerimiassen

FM 2026/119

Atassut

10. marts 2026

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Cannabisip inerteqqutaajunnaarsarneqarnissaanut Naalakkersuisut aallartitseqqullugit pilersaarummillu UKA2026 nallertinnagu saqqummiussaqaqqullugit aalajangiiffigisassatut siunnersuut

(Inatsisartunut ilaasortaq, Aqqalu C. Jerimiassen, Atassut)

Ikiaroomartooq naaggaarparput, anngiortumillu eqquinertaaq aamma naaggaarparput.

Una siunnersuut tassaangilaq inuiaqatigiit ikiaroornerulernissaannik siunnerfeqartoq, atornerluinerulli apparsarneqarsinnaanissaannik siunertaqartoq.

Akiorniartuaraluarparput ukiut tamarluinnaasa, pinerluttaalisitsisuniit ilanngaaserisunut, ulapporinnerilumi qujanartaqaat.

Maannali Nuummi mittarfissuup ammareernerata kingorna ikiaroorniutit sakkortuupilussuit eqqussuunneqartalersimasut annertuumik oqallisaalersimavoq.

Taakkununggalu nukigut maanna atortariaqalerpagut, cannabis-imiit sanaajusunut nukigut atornagit.

Cannabis-imit nioqqutissiat THC-taqartut ammaativinngit aqutamik inerteqqutaajunnaarsartariaqarpagut.

Inerteqqutaajunnaarsaaneq imerniartarfittut ittunik pisortat pigisaanniuppat, pisortalluunniit akuerisaannik ingerlanneqartunik pilersitsinikkut ingerlanneqarsinnaapput.

Tamannalu pillugu maannagaaq Ikiaroomartut pillugit Inatsisartut Inatsisaat nr.24 25. Novemberi 2022-iminngaannersoq allanngortittariaqarpagut.

Cannabis-imik inerteqqutaajunaarsaanikkut, sumiiffinnilu taamaallaat akuerisani atorneqarsinnaatinneratigut, aningaasat kaaviaartinneqartut katsorsaanernut peqqinnissaqarfiullu ingerlanneqarneranut toqqaannartumik kakkiunneqartariaqarpagut. Inerteqqutaajunnaarsitsinermi tassaasariaqarmata ikiaroomartumik atuinerup akiorniarneqarneratut isigisariaqartoq.

Inerteqqutaajunnaarsaanermi akiorniarneqartussat allat tassaapputtaa, maanna anngiortumik eqqussuinerup malittaannik annertoqisumik aningaasanik qernertuliorluni toqqaannaq nunatsinniit annissuinerujussuaq, naatsoqqissaarneqarsinnaanngilarmi maanna qanoq annertutigerpiartut ukiut tamarluinnaasa aningaasat tammaannartarnersut annissuunneqarlutik anngiortumik.



Taakku nunatsinni uninngatissinnaalerutsigit, akuerisamillu cannabis-it akuutipalaanik akoorneqanngitsut nunanit inerteqquteqarfiunngitsunit eqqunneqartalerpatassaaq hashpsykosernermit eqqungaasut annertuumik appariaateqarsinnaapput.

Assullu uani innersuukkusunnarpoq, nunani ammaassiviusimasuni taamatuttaarlu inerteqqutaajunnaarsaaffiusimasuni assigiinngissusaat misissussallugittaaq, tassami ammaassiinnaavinneq nalorninartoqariataarsinnaammat, taamaattumik inerteqqutaajunnaarsaaneq aqutissatut siullertut orniginarnerulluni.

Pinerlunnikkut nunani ammaassiviusimasuni kisitsisit, taamatullu pinerlunnerit ikiaroonartunik aallaaveqartut annertuumik appariaateqarfiusimapput, uppersaatissallu arlallit takussutissatut suliarneqarsimapput USA-mi naalagaaffiit annersaasa ilaannit inerteqqutaajunnaarsaaffiusimasumi New York-imi, allaffeqarfimmi Office of Cannabis Management-imit nalunaarusiarpassuusunit.

Peqqissutsikkullu iluaqutaasinnaasortai ammaassinerminnissaaq nalunaarusiarisimavaat, 2023-imilu nalunaarusiaasumi takuneqarsinnaavoq, inuit alzeimers-imik, autismimik, epilipsimik, isumatsassimanermik uippakajaarnermillu eqqugaasimasut misiliutitut nakorsarneqartarsimasut, taakkunanngalu agguaqatigiisillugu procentinngoraanni affai qaangeqqajuaannarai iluaqutigisimallugu nalunaaruteqartut.

Ersiut annerpaaq tassaasimavortaaq, ikiarooniutitik sakkortoorsuarnik ulorianarnerungaartunik atuinerup malunnaatilissuarmik appariaateqarsimanera.

Nunanit allanit misilittagaalereersut isiginngitsuusaaginnarsinnaanngilagut, anngiortumik eqqussorneqartuartoq nalinginnaasoriliinnagaq meeqqanut allaat siaruaassimasoq akiorniartariaqarparput! Anngiortumik tuniniaasartut soqutiginnigilaat pisiniartik meeraappat meeraanngippalluunniit, aningaasartai kisiisa naamavaat, tamakku aningorsinnaavagut!

Siunertat kusanartut tassaasuaannartariaqanngillat inernerit pitsassuit, ikiaroonartumik akiuiniarnissamut pinaversaartitsinermullu suliniuterpasuit piungaluarput, mannali illorsuaq qimaallakkutsigu takussaareerput tuniniaasusut. Piviusoq annernartoq taamaappoq.

Inerteqqutaajunnaarsaaneq tassaassaaq inuiaqatigiit peqqinnerulernissaannut siunertalik, atornerluinerulernissaannuunngitsoq.

Aningaasatigut ingerlatsinikkullu pisortanut kingunerisassai:

Pilersaarummik sananissamut piffissaq atorneqartussaq ukiup ilivitsup iluaniissinnaanissaa naatsorsuutigineqassaaq.

AC-fuldmægtigellu ukiup ataatsip sulineratut naleqassalluni 500.000kr.

Namminersortunut aningaasarsiornikkut allaffissornikkullu kingunerisassai:

Soqanngilaq.

Innuttaasunut aningaasarsiornikkut allaffissornikkullu kingunerisassai:

Soqanngilaq